

## Gairm

An cuala sibh gu bheil tuilleadh de na féidh Lochlannach air tighinn do'n Ghàidhealtachd? Saoil nach eil féidh gu leòir againn mar thà! Chan e féidh ach crodh as coir a chur air monaidhean na Gàidhealtachd—crodh is caoraich ann an àireamh iomchuidh. Rinn e call gur e caoraich a mhàin a bha air a' mhór-chuid de'n fheurach mhonadail o chionn faisg air ceud bliadhna. Is ann mar bhuil air sin a sgaoil an raineach agus a bheil e an diugh 'na chomhdach puinnseanta air iomadh gleann bòidheach.

Ach feumaidh sinn a bhith air ar faizeall a thaobh a' chruidh, mar an ceudna. Is math an obair a tha Mgr. Hobbs, an Inbhir-Lòchaidh, agus Morair Shìm a' deanamh, agus feadhainn eile. Chan fhaod sinn, ged thà, an obair-chruidh so fhàgail gu h-iomlan an làmhan nan uachdaran móra, air neo bithidh an crodh, mar a bha na caoraich agus na féidh, 'nan leisgeul gu bhith a' fògradh an t-sluaigh chumanta bhàrr an fhearainn.

\* \* \* \* \*

Nach misneachail am fear ud, Mgr. Rollo, a tha an déidh àit-oibre beag a chur suas an Inbhir-Asdail am Poll-Iùbh. Dhearbh e chèana leis an obair a thòisich e an Eisdeal gun gabh cosnadh de iomadh seòrsa a thoirt do dhaoine anns na sgìrean Gàidhealach, agus gun gabh feum a dheanamh de'n chumhachd-dhealain a chum na crìche sin. Is bochd nach eil tuilleadh de sheòrsa Mhgr. Rollo ann—daoine aig a bheil de dh'ùidh anns a' Ghàidhealtachd agus gun dean iad rud-eigin a chum feum an t-sluaigh. Chan e airgead nam bochd a tha na Gàidheil ag iarraidh, ach an cothrom an t-airgead aca fhéin a chosnadh 'nan tìr féin. Agus nach eil làn-chòir aca air sin, a cheart cho math is a tha aig muinntir eile?

\* \* \* \* \*

Is iomadh atharrachadh a rinn an carbad-ola air dòigh-beatha an t-sluaigh.

Tha sinn cleachdte gu leòir, air Ghàidhealtachd agus air Ghalldachd, ri bùth-air-chuibhleachean a bhith a' tadhal aig ar dorus, ach tha goireasan eile air chuibhleachean a' deanamh feum anns an Taobh-Tuath. Banc-air-chuibhleachan, leabhar-lann-air-chuibhleachan, uigheam-léigh-fhiacal-air-chuibhleachan, dealbhangluasadach-air-chuibhleachan! Chan eil feum againn a nis anns an Taobh-Tuath ach dìreach air rathaidean air am falbh na cuibhleachan an tomhas de chomhurtachd!

\* \* \* \* \*

Is e Samhradh Sònraichte a bhios ann an ath-bhliadhna, ge bè co a chì e. Tàirngnidh Crùnadh na Ban-rìgh na muillionan sluaigh as gach ceàrn de'n t-saoghal a dh'ionnsaigh na dùthcha so, agus ruigidh àireamh mhath dhiubh a' Ghàidhealtachd agus na h-Eileanan. A bheil fhios a bheil ullachadh 'ga dheanamh fa chomhair an t-sluaigh sin? Tha fhios gur math a dh'fhaodadh ceàrnan eile de'n dùthaich oidhirp a dheanamh coltach ris an t-Seachdain Sgitheanach. Gu dé mu dheighinn Seachdain Ileach, Seachdain Mhuileach, Seachdain Tirisdeach, Seachdain Leódhasach, Seachdain Uibhisteach?